

ИНТЕРНИ ЕТИЧНИ МЕДИЈНИ КОДЕКС

Национални совет рускей националней меншини и Новинско-издавательска установа „Руске слово“ през приношене заедничког интерного етичног кодексу виражую свою подполну прихильносц гу найвисшим професијним и етичним медийним стандардом – Кодексу новинарох Сербии, як и численим медзинародним и домашнім актом хтори гарантују шлебоду и плурализем медийох и висловйованя. Интерни етични кодекс засновуе ше на заедничким жаданю Националног совету и новинарох и занятих у НВУ „Руске слово“ же би гражданом обезпечели правдиве, непристрасне, благочасове и подполне информоване, и з тоту намиру ше з тим документом установуе механизми и процедури хтори оможлива највисши уровень ушорйовацкей независносци и медийног професионализма у НВУ „Руске слово“.

Тот документ цалком уважуе Кодекс новинарох Сербии, и у тим смислу вон не його замена. Напроцив, тот документ представя анекс того документа, хтори бере до огляду специфичносц медийох и информованя на языкох националних меншинох, як и одношене медзи Националним советом и медийох хторим вон, поштредно, снователь.

Национални совет рускей националней меншини и НВУ „Руске слово“ ше з тим документом операю на Европску конвенцију о людских правох, хтора констатуе же кажде ма право на шлебоду висловйованя, укључуюци шлебоду мац особне думане, примане и сообщоване информацијох и идейох без мишаня јавней власци, и без огляду на граніци. Тиж так, операю ше на Устав Републики Сербии з хторим ше гарантуе шлебоду думаня и висловйованя, як и шлебоду же би ше з бешеду, писаньом, слику лебо на даяки други способ гледало, примало и ширело обвисценя и идеї. На концу, операю ше и на Закон о јавним информованю и медийох, хтори у рамикох јавног интересу препознава и правдиве, непристрасне, правочасове и подполне информоване на мацеринским языку гражданох Републики Сербии, припаднікох националних меншинох, як и очуване културног и вирског идентитету националних меншинох хтори жию на територији Републики Сербии.

1. НВУ „Рускеслово” – друковани и онлайн сервис рускей националней меншини

Медії хторим, поштредно, снователе национални совити националних меншинох, финансию ше зоз явних жридлох Републики Сербії и представляю єден од способох витворйованя явного интересу у обласци явного информованя, прето и природне и логичне же би функционовали по принципах явних медийних сервисох. З того аспекту, тижньовнік „Руске слово” и новинска аґенция „Рутенпрес”, практично, представляю свойофайтови друковани и онлайн сервис рускей националней меншини у Сербії.

Медії хторим, поштредно, снователе национални совити националних меншинох, длужни свойо информованя и змисти усоглашиц з началами роботи явних медийних сервисох, односно їх обовязка буц гарант медийного плурализма на меншинскей медийней сцени и професийного информованя, през возпоставяне гаранцийох ушорйовацкей независносци медийох и унапредзене квалитету информованя и медийних шлебодох у меншинских штредкох.

Аналогно законскому ришеню о явних медийних сервисох, НВУ „Руске слово” свою роботу будзе засновйовац на шлідуючих началох:

- 1) правдиве, непристрасне, подполне и благочасове информоване;
- 2) независносц ушорйовацкей политики;
- 3) независносц од жридлох информованя;
- 4) забрана каждой форми цензури и незаконїтого упліву на роботу медийного сервису, Редакції и новинарох;
- 5) применьоване медзинародно припознатих нормох и началох, а окреме почитоване людских правох и шлебоди и демократичних вредносцох;
- 6) почитоване професийних стандардох и етичних кодексох.

У витворйованю явного интересу у обласци информованя на руским язичу, НВУ „Руске слово” ше у роботи будзе руководзиц зоз потребу за правдивим, благочасовим, подполним, непристрасним и професийним информованьом гражданох и за оможлівйованьом шлебодного формованя и висловйованя думаня; за почитованьом и порушованьом плурализма политичних, вирских и других идейох и оможлівйоване явносци же би була упозната з тима идеями, не служащи ше з интересами дзепоедних политичних странкох и вирских заедніцох, як ані зоз гоч хторим другим политичним, економским, вирским и подобним становиском лебо интересом; за непристрасним обрабяньом политичних, историйних, привредних, социялних, здравствених, културних, образовних, наукових, екологийних и других питаньох, оможлівуюци ровноправне зочоване розличних становискох; за

задовольованьом потребох у информованю шицких часцох дружтва без дискриминації, як и за задовольованьом потребох гражданох за змістами хтори обезпечую очуване и виражоване културного и вирского идентитету, афирмоване национальних културних вредносцох рускей национальней меншини и хтори змоцнюю интеркултуралносц.

2. Национални совет рускей национальней меншини и НВУ „Руске слово”

Национални совет рускей национальней меншини длужни НВУ „Руске слово” благочасово доручовац поволанки, одвитујуци материял и релевантни информации о шицких планованих активносцох Национального совиту, членох совиту, одборох и роботних целох.

НВУ „Руске слово” длужна оможлівиц професийне, обективне, правочасове, непристрасне, квалитетне, совисне, критичне и шлебодне информоване, односно информоване и пририхтоване медийних змістох по найвисших стандардох и нормах хтори предписуе Кодекс новинарох Сербії, як и други обовязуюци правни и саморегулативни акти.

Национални совет рускей национальней меншини длужен обезпечиц условия за шлебодни розвой професионализма и независней ушорйовацкей политики медийохла хторим є, поштредно, снователь (у рамикох НВУ „Руске слово”). Будзе ше почитовац и спонукац медийни плурализем, возпоставяне явного диялогу и оможлівйоване же би явносц була упозната з розличними идеями и думанями без служеня гоч хторому поєдинечному интересу, през ґарантоване почитованя ушорйовацкей независносци медийохла и права на шлебодне и критичне виражоване.

3. НВУ „Руске слово” и кадровска политика

Возпоставя ше механізми заштити независней ушорйовацкей политики медийохла хторим, поштредно, снователе национални совети национальних меншинохла през унапреджене процедурохла при вибору членох управних целохла, редакторохла и директора Установи.

З тим саморегулативним документом утвердзує ше механізем хтори афирмує и устаємнює уж постояцу праксу консултативного вияшньованя занятих у НВУ „Руске слово” през тайне гласане з нагоди вибору:

- Управного одбору зоз шора занятих у НВУ „Руске слово”, трох членох
- главного и одвического редактора тижньовніка „Руске слово”,
- директора НВУ „Руске слово”.

Понеже Статут НВУ „Руске слово” предвидзує же трох членох Управного одбору (УО) тей Установи, зоз шорох занятих, предклада директор НВУ „Руске слово”, док шейсц менує Национални совет рускей националней меншини, а УО НВУ „Руске слово” вибера, на основи явного конкурса, и розришує главного и одвичательного редактора и директора тей Установи, установює ше пракса обовязного консултованя занятих/Редакції о кандидатах за тоті функції. Пред тим як цо ше предложи/вибере кандидатах за тоті функції, заняти у НВУ „Руске слово”, з тайним гласаньом, вияшня ше о потримованю кандидатах за трох членох УО з тей Установи, як и за директора НВУ „Руске слово”, односно члени Редакції за главного и одвичательного редактора тижньовніка „Руске слово”, и то потим як кандидати членом колектива, пред виношеньом предкладаня директора Установи, односно по законченю конкурсного поступку, представляв свойо програми.

У процедури предкладаня и одлучованя о виборе кандидатах за тоті функції, кандидати хтори би достали найвецей гласи членох колектива/Редакції були би кандидати хтори маю найвекше довириє занятих. Думанє членох колектива, у складзе зоз пестованьом добрей пракси и змоцньованьом взаємного довирия на релациї Национални совет рускей националней меншини – заняти у НВУ „Руске слово”, зоз полним уважованьом, будзе ше розпатрац кед ше будзе предкладац и одлучовац о виборе кандидатах за тоті функції.

НВУ „Руске слово” и Национални совет рускей националней меншини будзе почитовац постояци здобути пракси и стандарди зоз Актох о систематизації НВУ „Руске слово” хтори ше одноша на критериюми вибору членох Редакції, редакторох, директора, администрації и других занятих на основи їх квалификаційох и роботного искуства по найвисших стандардох хтори предписує законодавство Републики Сербії. Тото ше одноши и на процедури за приманє на роботу и поставяне на функції у складзе зоз Статутом Установи и законами Републики Сербії.

4. НВУ „Руске слово” и виберанки

У периодзе активносцох у предвиберанкових кампаньох за виберанки НВУ „Руске слово” ше будзе стриктно тримац одредбох Кодекса новинарох Сербії (2010). Будзе ше руководзиц з принципом непристрасного и еднакого представляня политичних странкох, коалиційох и кандидатах хтори маю потвердзени виберанково лістини за республични, покраїнски лебо локални виберанки (месни заєдніци) док тирва предвиберанкова кампаня, а понеже виберанки за национални совети националних меншинох представляю политични процес вибору за найвисше цело культурней автономії националних меншинох у Републики Сербії, НВУ „Руске слово” тим виберанком пошвеци наглашену увагу. Тижньовнік „Руске слово” и новинска агенция „Рутенпрес”

устаємні и скорейшу позитивну праксу же би, у намири же би шицким кандидатом/лістином обезпечело еднаки простор, обективни и непристрасни приступ у свойофайтовим друкованим медийним явним сервису на руским язичу, за предвиберанкову кампаню у виберанкох за нове зване Национального совиту рускей националней меншини напредок утвездзела правила о провадзеню предвиберанковой кампані (постояци саморегулативни Информатор за проваджене предвиберанковой кампані у НВУ „Руске слово”), хтора ше будзе еднак одношиц ґу шицким подношительом виберанкових лістинох и о хторих вони буду напредок обвисцени.

У информованю док тирва предвиберанкова кампаня дошлїдно ше будзе применювац одредби Кодексу новинарох Сербії, спрам хторих „новинар не информує о темох у хторих ма приватни (особни, лебо ґрупни) интерес”, односно „участвоване у политичней, виберанковой лебо медийней кампані (политични странки/компанії и сличне), не мож оконцовац источашне з новинарску/редакторску роботу”. Тиж так и „политична активносц членох фамелії новинара/редактора би могла виволац правдиве, лебо привидне зражене интересох”. У складзе зоз тим, новинаре НВУ „Руске слово”, у случаю же буду кандидати на виберанкових лістинох, буду длужни о тим обвисциц одвичательного редактора. Подполни приступ у предвиберанковим информованю будзе же „отворене закладане за єдну странку лебо опцию неспоїве з новинарску професию”.

Же би ше зопарло нукашні зраженя интересох, НВУ „Руске слово” ше будзе руководзиц з напрямом Кодексу новинарох Сербії, спрам хторого би „новинар/редактор не требал информовац о темох у хторих ма особни, политични лебо комерциялни интерес, напр. як член управного, надпатраюцого, лебо діяльного одбору компанії/орґанізації/клубу и сл.”

Маюци у виду одредбу Кодексу новинарох Сербії по хторей „з новинарску професию неспоїва работа у ПР и маркетинґских агенцийох, агенцийох за лобиране, державних орґанох и институцийох, як и политичних партийох”, новинаре и редакторе НВУ „Руске слово” зоз ступаньом на явни функції буду длужни о тим обвисциц руководство Установи.

Члени Национального совиту рускей националней меншини хтори одвичательни редакторе лебо заменіки главного и одвичательного редактора НВУ „Руске слово” пре зражене интересох не будзе ше виберац до двотрецинового членства Управного одбору НВУ „Руске слово” (хтори менує Национални совет рускей националней меншини), а ані ше вони, у розправи у Националним совиту рускей националней меншини не буду вияшньовац и гласац о своїх рочних звітох и планах.

5. Закончующи одредби

Национални совет рускей националней меншини и НВУ „Руске слово“ ше закладаю же би ше ключни тези того документа уключели до Националней стратегиі Руснацох у Републики Сербіі (по 2030).

Етични кодекс саморегулативи по його прилапйованю будзе явни документ и будзе обявени на веб-сайту Национального совиту рускей националней меншини, як и НВУ „Руске слово“.

За надпатранє над запровадзованьом, односно за провадженє почитованя того документа будзе ше формовац штирочлене цело, составене зоз кандидованих представнікох НВУ „Руске слово“, Национального совиту рускей националней меншини (Одбору за информованє) и фахових новинарских здруженьох – Независного дружтва новинарох Войводини и Новинарска асоциация Руснацох. Найменей раз рочне того цело явно обяви свою анализу и оцену о почитованю основних принципох и началах прилапеного саморегулативного кодексу.

Тото цело будзе розпатрац и евентуални жалби хтори би ше могло поднесц у случайох потупеня основних принципох саморегулативного документа. Жалби можу поднесц поєдинци, оргџанизациі лебо институциі хтори думая же су очкодовани пре непочитованє основних принципох семорегулативного кодексу.


Одлуки цела за провадженє почитованя того документа, як и одлуки о евентуалних жалбох буду явни и доступни на веб-сайту НВУ „Руске слово“.

Новинско - издавательна установа

Национални совет рускей

„Руске слово“

националней меншини



Борис Варга, директор



Борислав Сакач, председатель

У Новим Садзе, 16.12.2019. року